



Inatsisartunut ilaasortat

Sivert K. Heilmann aamma Knud Kristiansen, ATASSUT.

**§ 37 imm.1 malillugu Atassummit pensionisiallit siusinaartumillu sulisinnaajunnaarnersiutisiallit pisartagaasa qaffanneqarnissaa Naalakkersuisut pilersaaruteqarnersut apeqqutigineqartumut nr.2012-38-mut akissut.**

13. feb. 2012  
Sagsnr. 2012-061463  
Dok. Nr. 825865

Postboks 260  
3900 Nuuk  
Tlf. (+299) 34 50 00  
Fax (+299) 34 66 66  
E-mail: ikinn@nanoq.gl  
www.nanoq.gl

Asasakka Inatsisartunut ilaasortat Sivert K. Heilmann aamma Knud Kristiansen.

Utoqqalinersiat siusinaartumillu sulisinnaajunnaarnersiutisiat pillugit Naalakkersuisunut apeqqutigisassinnut qjanaq.

Apeqqu:

Atassummit Naalakkersuisunut apeqqutigerusupparput pisortanit aningaasanik pisartaqaqartut utoqqalinersiutillit siusinaartumillu sulisinnaajunnaarnersiutisiallit akiligassatik akilereerlugit qaammatip sinneranut inuuniutissaminnut amikkisaartaqisut annertussusaasa qaffaavigineqarsinnaaneri Naalakkersuisunit sulissutiginiarneqarnersooq apeqqutigissavarput?

Akissut:

Utoqqalinermit pensionisiat Inatsisartut peqqussutaat nr. 3, 7. maj 2007-imeersoq malillugu tunniunneqartarput. Utoqqalinersiat isumaginninnermi pensionisiaapput utoqqarnut aningaasaqarnikkut atugarliornerusunut atugassiaasut. Utoqqalinersiaqartitsinikkut taamaalilluni siunertaavoq utoqqarnut innuttaaqataasunut aningaasaqarnikkut atugassaritaasut isumannaarneqarnissaat. Utoqqalinersiat tunngaviumik aningaasartaqarput, kommunip aalajangigaanik atorineqarsinnaasunik aningaasartaqarlutik, meeqqanut tapisassartaqarlutik inummullu tapertaqarlutik. Utoqqalinersiaqarsinnaanermut qanorlu annertutiginissaannut inoqutigii isertitaat akileraarusigassaatitaasut tamarmisut annertussusaat apeqqutaasarput.

Siusinaartumik pensionisiat Inatsisartut peqqussutaat nr. 4, 7. maj 2007-imeersoq malillugu tunniunneqartarput. Siusinaartumik pensionisiaqalersinneqarsinnaapput inuit inuussutissarsiorsinnaanerat timikkut, tarnikkut inuuniarnikkullunniit pissuteqartumik ataavartumik annikillismagaangat. Siusinaartumik pensionisiat inuiaqatigiit atugarissarfiusut inuuniarnikkut isumannaallisaataannut ilaapput, inunnullu ataavartumik inuussutissarsiorsinnaalluarunnaarsimasunut aningaasaqarnikkut isumannaallisaataallutik. Pensionisiat tunngaviumik aningaasartaqarput, meeqqanut tapertaqarlutik inummullu tapertaqarlutik.

Naalakkersuisut anguniagaraat innuttaasunut utoqqarnut tamanut sullissinerup qaffasisuunissaata sapinngisamik qulakkeerneqarnissaa. Utoqqalinermit pensionisiat tassaapput utoqqalilernermit inuussutissatut qulakkeerinissutit. Sulissutigineqartariaqarportaaq

suliniutit aallartisarneqarnissaat una siunertaralugu kikkut tamarmik imminnut ataavartumik sapinngisamillu ikiorsinnaanissaat tunaartaralugu. Taamaalillutik utoqqaat angerlarsimaffimminni najugaqaannarnissaanut periarfissiineruvoq, Naalakkersuisummi tamanna inuunermi nalituutut isigimmassuk.

Akilerartarnermut Atugarissaarnermullu Isumalioqatigiissitaq naliliivoq pensionisiat ulumikkut ajorisassaangitsumik qaffasissuseqartut. Naalakkersuisut isumaqarput tamanna ajunngilluinnartuusoq. Kisiannili ilisimaaralugu utoqqalinersiaqartitsinermik aaqqissuussinerup tunngaviusumik allanngortinneqarnissaa annertuumik pisariaqartinneqarmat, taamaalilluni utoqqalinersiat ukiut marluk siusinnerusukkut isertitat tunngaviginagit isertitarisartakkalli pissarsiarineqartut tunngavigalugit akiliutigineqartassammata. Tamatuma kingunerissavaa siunnerfigissaarnerusumik utoqqalinersiaqartitsinermik aaqqissuussineq maannakkullu tapisiaqartitsisarnermik pisariinnerulersitsineq.

Isumalioqatigiissitap oqaatiginikuuaa utoqqalineq inuunerup ilagimmagu. Taamaammat siumut isiginiartoqarsinnaavoq inuiaqatigiillu utoqqartaminnik isumaginninnerat, utoqqarnut inissianik atoruminartunik annertusaaneq minnerunngitsumillu ataasiakkaat utoqqalinissaminnut ileqqaagaqarsinnaanerap pilersaaruserlugit. Naalakkersuisut taamaammat Isumalioqatigiissitap soraarninngornissamut ileqqaartussaaitaanermik siunnersuutaa tapersersorpaat. Taamaaliornikkut utoqqalisut tamarmik aningaasaqarnikkut toqqissisimanartumik atugaqarnissaat isumannaarneqarsinnaavoq.

Siusinaartumik pensionisiaqalartarnermut tunngatillugu Naalakkersuisut isumaginninnermi ikiorsiissutigineqartartut taamatuttaaq siusinaartumik pensionisiat allanngortinneqarnissaat pillugu Akilerartarnermut Atugarissaarnermullu Isumalioqatigiissitap siunnersuutaanut tunngavigineqartunit pingaarnertutanut isumaqataapput. Isumaginninnermi ikiorsiissutigineqartartunut aallaavigineqassaaq inuit sapinngisamik imminnut pilersorsinnaanissaat. Inuiaqatigiinnut ataasiakkaanulluunniit iluaqutaanngilaq inuuneq naalugu susassaqarani pilersugaalluni inissisimanissaq.

Naalakkersuisut sulissutiginiarpaat eqaatsunik malittarisassaliortoqarnissaa, siusinaartumik pensionisiallit ilaannakortumik sulinissaminnut periarfissinneqarsinnaaqqullugit, siusinaartumik pensionisiaqarsinnaanertik annaangikkaluarlugu. Peqatigitillugulu inuuniarnikkut ajornartorsiutit siusinaartumik pensionisiaqalernermik kinguneqartinneqartassanngillat. Assersuutigalugu atonerluinermik ajornartorsiuteqaraanni katsorsartinneq pisariaqarpoq, siusinaartumik pensionisiaqalernermik kinguneqarani.

Naalakkersuisut naliliipput pensionisiaqarnermut tunngassuteqartuni malittarisassat suliarineqarneranni Akilerartarnermut Atugarissaarnermullu Isumalioqatigiissitap siunnersuutai tunngavigineqartariaqartut. Taamaammat Naalakkersuisut utoqqalinersialinnut siusinaartumillu pensionisialinnut pensionisiat qaffanneqarnissaannik pilersaaruteqarnerut toqqarlugu apeqqutigineqartumut akissutigineqassaaq Naalakkersuisut taamaaliorniannngimmata.

Maluginiaqquneqarporli sulisinnaajunnaarnersiutisiat siusinaartumillu sulisinnaajunnaarnersiutisiat akit qaffakkiartorneri malillugit akissarsiassat nalimmassarneqartarmata. Sulisinnaajunnaarnersiutisiaqarneq nunatsinni akileraartarnerup ineriartornera malitsigalugu sillimaffigineqalereernikummat.

Inussiarnersumik inuulluaqqusillunga



Mimi Karlsen